

PSI jubileis en St. Andreasberg 178 gastoj partoprenis la 25an Printempan Semajnon

Estas kiel unua labortago en nova laborloko, kiam oni partoprenas la unuan fojon en Esperanto-renkontiĝo. Tute nova mondo kun specifa homo-tipo, iom fremdaj ĉirkonstancoj, miksaĵo inter ĝojo pro novkomenco kaj malcertececo pri la estonteco.

Tiel mi sentis, kiam mi la unuan fojon partoprenis Esperanto-renkontiĝon, estis dum la jarŝanĝo 2000/2001 la Internacia Seminario en Cuxhaven. Kaj same mi sentis min ĉi-jare, kiam mi trempiĝis en la mondo de la plenkreskulaj renkontiĝoj. Mi estas preskaŭ 27-jara, do bona tempo por eniri novan mondon, ĉu ne?

Jam la alvojaĝo sentigis min alveni en alia mondo. Kiam mi eniris la buson al St. Andreasberg en la stacio de Herzberg ĉe Harco (ah, pardonu, Herzberg la Esperanto-Urbo ĉe Harco), do jam dum la busveturado oni sentas sin kiel sur alia stelo. Valoj enmeze de grandaj pinarbaroj, rokaro kovrita de musko, malplenaj dometoj ĉe la strato, homoj sidante apud la strato, atendante la vivon.

Kiam mi alvenis en la Internacia Domo Sonnenberg (sunmonto), min jam memorigis multo al Esperanto-renkontiĝo. Multaj aŭtomobiloj kun fremdaj signoj promesis internaciecon. Jam estis fruvespere, la homoj estis ie, sed ne ekstere atendante kaj bonvenigante min. Sed kion mi atendas, homo, kiu nur venas meze de la renkontiĝo? Mi ĝoju, kiam estas lito ankoraŭ. Mi eniris la ĉefan domon. Apud la granda salono mi aŭdis sonon. „Saluton Andreas“ min alparolis konata voĉo. Kaj tuj mi sentis min hejme, la parolanto estas, same kiel mi, vestfalo kiu akceptis min en sia arealo, estis Helmut Klünder, la monasterlandano en sia trinkejo aŭ kiel li diras: knajpo. Kaj multaj vestfaliaj knajpoj povus fieri pri la bierofero tie. Sed tio ne estu temo nun. La posta akceptado estis kiel en junulara renkontiĝo kaj ankaŭ la lito-disdonado estis konata proceduro. Miaj kunĉambranoj estas

en la ĉambro, ankaŭ ili atendas la vesperan programon: komercema ukrainano, kiu tuj prezentis al mi siajn varojn kaj laborema hungaro, kiun mi jam vidis dum la pasinta Internacia Junulara Kongreso en Hungario.



Dum la sekvinta vespera programo estis pupteatraĵo, kiu estis surprizo por mi, ĉefe ĉar mi antaŭe ne povis imagi, ke celgrupo de pupteatraĵo ankaŭ povas esti plenkreskuloj kaj same, ke ĝi ankaŭ estas interesa okazaĵo por mi mem. La arbara nano Hörbe montris sian mondon kaj la ludanto Christoph Frank bone vivigis la figuron per siaj fingroj kaj sia voĉo. Nemenciinda la salutproceduro inter la konataj amikoj miaj, ŝajne plenkreskulaj renkontiĝoj ne estas tute aparta mondo.

La matenmanĝo estis iom stranga situacio. En junulara renkontiĝo kutime nur kelkaj junuloj matenmanĝas. Aŭ oni nur ĵus iris dormi, aŭ oni ankoraŭ dormas por poste viziti la antaŭtagmezajn prelegojn. Dum PSI la tuta manĝejo estas plena. Familioj kun infanoj, paroj, maljunuloj kaj eĉ kelkaj mezjunuloj en mia aĝo sidas ĉe la tabloj kaj vigle kaj manĝante preparas sin por la tago.

La Internacia Domo Sonnenberg situas meze en la arbaro kaj havas vere belan ĉirkaŭaĵon. Meze en la montaro Harco oni bone povas atingi ĉiun vidindaĵon de la montaro, ekzemple la historian trajnon al la ĉefmonto. Dum PSI ni

faris kelkajn ekskursojn al la ĉirkaŭaj vidindaĵoj. Krom la ekskursoj estis multaj programeroj en la domo mem. Krom la temaj prelegoj estis infanaj programeroj kaj prezentado de la Esperanta vivo. Ekz. estis prezentado de Juan Lazaro pri la Universala Kongreso en Kubo venontjare kaj prezentado de Germana kaj Eŭropa Kongreso en Herzberg fine de majo.

Vere ripetinda afero estis la jubilea balo kun dancado kaj festado. Kaj denove paraleloj: Ankaŭ la plenkreskuloj festas ĝis la nokto nokto-, nokto-fin'...

Dum la lasta tago en Harco komencis pluvi. Sed tamen, estis bona ekskurso al la mondo de plenkreskulaj Esperanto-renkontiĝoj. *Andreas Diemel*

La PSI-historio

jaro	loko	partoprenantoj
1985	Bielefeld	35
1986	Wetzlar	55
1987	Rastatt	55
1988	Jünkerath	58
1989	Hopsten	63
1990	Todtmoos	72
1991	Jünkerath	115
1992	Bad Neuenahr-Ahrweiler	112
1993	Hilders-Oberbernharde	136
1994	Jünkerath	144
1995	Waldfischbach-Burgalben	111
1996	Duderstadt	136
1997	Duderstadt	149
1998	Bonn	148
1999	St. Andreasberg	159
2000	St. Andreasberg	161
2001	St. Andreasberg	160
2002	Waldfischbach-Burgalben	169
2003	Bonn	173
2004	Duderstadt	132
2005	Mücke	122
2006	St. Andreasberg	164
2007	Bonn	160
2008	Waldfischbach-Burgalben	167
2009	St. Andreasberg	176

La venonta PSI okazos de la 2a ĝis la 9a de aprilo 2010 en St. Andreasberg.

La organizantoj de la Printempa Semajno Internacia



(malantaŭe de maldekstre) Marika Frense, Lars Sözüer, Christine Brücker, Jörg Gersonde, Helmut Klünder, Julika Rosenstock, Rudolf Fischer (3a vico d.m.) Daniel König, Franz Kruse, Elisabeth Kuhl-Kruse, Wolfgang Loose, Heike Buhr, Gordon Böhm, (2a vico d.m.) Manfred Sona, Ikuko Sona, Stefan Kriehoff, Brigitte Kranz, Ilona Schmid-Bohr, Wolfgang Bohr, (antaŭe d.m.) Bruno Knapstein; Gisela Loose; Hedwig Fischer kaj Jule. Malgranda foto: Ella Klünder (mortis 2002)